

157-модда. Бюджет ссудалари, кредит линиялари ва кредитлар бериш

Бюджет ссудалари, кредит линиялари ва кредитлар Ўзбекистон Республикасининг республика бюджети маблағлари ва қонун ҳужжатларига мувофиқ бошқа манбалар ҳисобидан берилиши мумкин.

Бюджет ссудалари, кредит линиялари ва кредитларни бериш қонун ҳужжатлари ҳамда шартнома билан белгиланадиган муддатлилик, қайтариш, мақсадли фойдаланиш шартларига ва бошқа шартларга асосланади.

158-модда. Резидент-юримдик шахсларга бериладиган (очиладиган) бюджет ссудалари ва кредит линиялари

Бюджет ссудалари ва кредит линиялари резидент-юримдик шахсларга Ўзбекистон Республикаси Вазирлар Маҳкамасининг қарорлари асосида берилиши (очирилиши) мумкин.

Бюджет ссудалари бюджет ташкилотларига бевосита Ўзбекистон Республикаси Молия вазирлиги томонидан берилади.

Кредит линиялари Ўзбекистон Республикаси Молия вазирлиги томонидан резидент-юримдик шахсларга уларга хизмат кўрсатадиган тижорат банклари орқали, шунингдек бевосита тижорат банкларига очилади.

159-модда. Бюджет ссудаси ва кредит линиясини ўз вақтида қайтармаслик

Бюджет ссудаси ёки кредит линияси, шу жумладан фоизлар бюджет ссудасини бериш ёки кредит линиясини очиш тўғрисидаги шартномада белгиланган муддатларда ва ҳажмларда ўз вақтида қайтарилмаган тақдирда Ўзбекистон Республикаси Молия вазирлиги:

қарзни қарздордан сўзсиз тартибда ундиради;
ҳар бир кечиктирилган кун учун муддати ўтказиб
юборилган қарз суммасининг 0,033 фоизи миқдорида пеня
ҳисоблайди.

160-модда. Чет давлатларга бериладиган кредитлар

Чет давлатларга кредитлар белгиланган тартибда
берилади.